



Uunga siunnersuut: Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaata allannngortinneqarnera pillugu Inatsisartut inatsisaat nr. xx ulloq xx. xxx 2017-imeersoq (Annikitsunik taarsigassarsititsisarnermik aqqissuussineq)
(Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoq)

Naalakkersuisunut ilaasortap Naalakkersuisut sinnnerlugit aaliangiiffisassatut siunnersuutaanut qulaani pineqartumut qujalluta, matumuuna Inuit Ataqatigiinniit imatut oqaaseqaateqassaagut.

Naalakkersuisut taamatut inatsisissasut siunnersuuteqarnerminni Inuit Ataqatigiit qineqqusaarnermi kingullermi qineqqusaarutigisimasaat, Inuit Ataqatigiillu gruppiata 2016-mi upernaakkut ataatsi-miinnermi aaliangiiffisassatut siunnersuutigini kuusimasaata imm.48, inatsisartunilu akuersissutigineqarsimasoq tunngavilersuutigaat.

Imm.48-ip oqariartuutaa siunertaalu naatsumik oqaatigissagaanni imatut oqaatigineqarsinnaagunar-poq:

Ullumikkut suliffeqarfeeqqanik aallarnisaaniarneq pisariuallaaqaaq; inuussutissarsiutinik aallarni-saaniarnermut periarfissat ullumikkut atuuttut – aningaasaliisarfiit siunnersorteqarfiillu ullumikkut pioreersut suliffeqarfeeqqamik aallartitsiniartumut naleqqukkunnaarsimapput. Ullumikkut periarfis-sat pitsaanerususariaqarput eqaannerusariaqarlutillu.

Taamaattumik imm. 48-ip anguniagaa siunertaalu Inuit Ataqatigiinniit isumaqatigigatsigu oqaluserisassaq akuersaarlutigu ingerlateqqissimavarput, isumaqaratta ullumikkut suliffeqarfeeqqamik aallarnisaaniarnermut tunngatillugu periarfissarititaasut eqaannerullutillu pitsaanerusariaqartut.

Aningaasaateqarfinnguaq pilersinneqartussaq pilersinneqaruni qularnanngilaq aallarnisaaniarnerup tungaatigut ineriartortitsiniarnermi iluaqutaalluassasoq. Inuit Ataqatigiinniit qularutigingilarput aningaasaateqarfinnguaq pilersinneqartussaq aallarnisaarusuttut akornannit makkunanga atorluar-neqalerumaartoq:

Takornariaqartitsinerup iluani inerisaarusuttunit, ujaqqanik erlinnartunik pinnerasaasiortartunngoru-suttunit, sanaluttartunngorusuttunit, kulturikkut ingerlatsivimmik pilersitserusuttunit, soorlu filmiortartunngorusuttunit, immiussisartunngorusuttunit, nipilersortartunngorusuttunit, kalaallisuu-liortartunngorusuttunilluunniit.

Qulaani taakkartorneqartut assersuutaannaapput, immaq suli allalippassuaqaraluarpoq pilersitseru-sullutik utaqqiinnartunit; qallunaat oqariartaasiat malillugu takorluisinnaanerup taamaallaat tamanna killilersinnaavaa. Nunarput inuusuttunik pikkorissorpassuarnik ulikkaarpoq nutaaliorusut-tunik, aningaasaateqarfimmillu pilersitsinitsigut inuusuttut aallarnissaarusuttut pitsaasumik periar-fississavagut.

Inuit Ataqatigiinniit iluiarisimaarparput inatsisissami allassimammat namminersorlutik oqartussat kommunillu suleqatigiillutik aningaasaateqarfissaq pineqartoq aningaasalersueqataaffigissagaat.

Kommunit peqataatinneqarneratigut taamalilluni aallarnisaaniartunut sullissinerput pitsaaneruler-lunilu atuisuinut qaninnerulersinneqassaaq.

Naggataatigut; nunatsinni aallarnisaasut ilaat tassalu Poul Holm, qanittukkut tusagassiutini allaaserineqarpoq, allaaserisamilu tassani atuarneqarsinnaavoq Poul Holm nunatsinniit DK-mut nuuttariaqalersimasoq, DK-mullu nuuttariaqalernerminut tunngavilersuutaa uggornarluinnaqqissa-artutut, ajuusaarnarluinnaqqissaartutullu Inuit Ataqatigiinniit isigigatsigu oqaatigerusupparput.

Tassami nunatsinnigooq aallarnisaasutut atugassarititaasut pitsaanngippallaarnerujussuat Poulip DK-mut nuuttariaqalernerminut peqqutaatippaa.

Tamanna uggornarpoq ajuusaarnarpallaaqaarlu. Taamaattoqartariaqanngikkaluarpoq. Inuit taammaattut nunatsinni atorfissaqartippagut pisariaqartippagullu. Inuillu tamakku qimarratilissan-ngippata taava nunatsinni aallarnisaaniarnerup tungaatigut atugassarititaasut sukkut tamatigut pitsa-nngorsartuartaqarpoq.

Nunatsinni aallarnisaasutut periarfissat atugassarititaasullu pitsaanerujussuusariaqarput. Nunatsinni inuussutissarsiornikkut inerisaaniarneq sukkut tamatigut ajornannginnerusariaqarpoq. Tamannalu uagut Inuit Ataqatigiinniit aaqutissiuukkusupparput iliuuseqarfigerusupparpullu.

Taamatut Inuit Ataqatigiinniit oqaaseqarluta, Naalakkersuisut siunnersuutaat taperserlugu ataatsimi-isitaliamut susassaqartumut ingerlateqqinneqarnissaa inassuteqaatigaarput..

Qujanaq

Peter Olsen